

## **Nakorsaatit pilerisaarutigineqartarnerat pillugu Namminersornerullutik Oqartussat nalunaarutaat nr. 29, 14. november 2005-imeersaq**

Nakorsaatit pillugit inatsisisartut peqqussutaanni nr. 1-imi 12. maj 2005-imeersumi § 22, imm. 2, aamma § 24, imm. 4, naapertorlugit aalajangersarneqarput.

### *Atuuffia*

**§ 1.** Nalunaarummi pineqarput nakorsaatit, nakorsaatit pillugit inatsisisartut peqqussutaanni pineqartut pilerisaarutigineqartarnerat.

Imm. 2. Aviisit nunanit allanit tikisitat, atuagassiat, atuagassiat sap.akunnikkuutaartumik saqqummersartut aamma tusagassiorfiit assilissanik sarsuatitsiviit nalunaarummi matumani piumasaaqatinut ilaatinneqanngillat.

### *Innuttaasunut pilerisaaruteqartarnej*

**§ 2.** Innuttaasunut nakorsaatinik pilerisaaruteqarnej ima ilusilersorsimassaaq pilerisaarutaanera aamma pilerisaarummi nakorsaatit pineqarnerat erseqqissumik takuneqarsinnaassalluni.

Imm. 2. § 3-mi taaneqartut eqqaassanngikkaanni pilerisaarummi makku paasissutissiissutigineqassapput:

- 1) Nakorsaatip taaguutaa. Nakorsaat sunniuttartumik ataasiinnarmik akoqarpat, ataatsimut taaguut atorneqassaaq.
- 2) Sunniutai, saniatigut sunniutai annertussusiliisarnerlu.
- 3) Poortat qanoq annertutigisumik imaqarnerat.
- 4) Poortap iluani allagartakkut imaluunniit poortap qaavani allagartakkut ilitersuutigineqartut peqqissaartumik atuarneqarnissaat ersarissumik atuaruminartumillu kaammatuutigineqassaaq.
- 5) Nakorsaasiortup internetimi adressea.
- 6) Nakorsaatip eqqortumik pissusissamisoortumillu atorneqarnissaanut paasissutissat allat pisariallit.
- 7) Nalornisoqartillugu nakorsamut imaluunniit uumasut nakorsaannut attaveqarnissamik kaammattuut.

**§ 3.** Filmertarfinni filmit pilerisaarutit, aamma videokkut dvd-kkullu isiginnaagassiani pilerisaarutit paasissutissanik makkuninnga imaqassapput:

- 1) Nakorsaatip taaguutaa. Nakorsaat sunniuttartumik ataasiinnarmik akoqarpat, ataatsimut taaguut atorneqassaaq.
- 2) Sunniutai saniatigullu sunniutai.
- 3) Poortap iluani allagartakkut imaluunniit poortap qaavani allagartakkut ilitersuutigineqartut peqqissaartumik atuarneqarnissaat ersarissumik kaammatuutigineqassaaq
- 4) Nakorsaatip eqqortumik pissusissamisoortumillu atorneqarnissaanut paasissutissat allat pisariallit.

5) Nalornisoqartillugu nakorsamut imaluunniit uumasut nakorsaannut attaveqarnissamik kaammattuut.

**§ 4.** Nakorsaatip innuttaasunut pilerisaarutiginera:

- 1) nakorsamut imaluunniit uumasut nakorsaannut nakorsiarnissap pisariaqannginneranik isumaqalersitsissanngilaq,
- 2) nakorsaatip sunniuttarnerata qulakkeerneqarsimaneranik, kingunerlutsitsisannginneranik imaluunniit allatut katsorsarneqarnermit, tassunga ilanngullugu allamik nakorsaatitortinneqarnermit pitsaaneruneranik imaluunniit assinganik sunniuteqartarneranik isumaqalersitsissanngilaq,
- 3) nalinginnaasumik peqqissutsip nakorsaatitornikkut pitsaanerulersinneqarsinnaaneranik isumaqalersitsissanngilaq,
- 4) nalinginnaasumik peqqissutsip nakorsaatitunninnikkut ajornerulersinneqarsinnaaneranik isumaqalersitsissanngilaq,
- 5) pilerisaarinermit meeqqat kisiisa eqqarsaatigalugit meeqqalluunniit pingaarnerutillugit saaffigineqassanngillat,
- 6) ilisimatusartunit, inunnit nakorsaatilerisunit inunnilluunniit allanit, inunnit peqatigiinnit, paaqqinnittarfinit, sullivinnit il.il. ataqqisaanertik sakkugalugu nakorsaatinik atuinerulersitsinnaasumik kaammattuutinik imaqassanngilaq,
- 7) nakorsaat inuussutissanut, pinnersaatinut allanulluunniit nioqqutissanut sanilliunneqassanngilaq,
- 8) nakorsaatip akuisa "pinngortitameersuunerat" peqqutigalugu nakorsaatip isumannaatsuuneranik imaluunniit nakorsaatip sunniuteqartarneranik isumaqalersitsisoqassanngilaq,
- 9) nakorsaat kukkusumik imminut nappaasersornissamut uukapaatitsisinnaassuseqassanngilaq,
- 10) nakorsaat ingasattajaartumik, annilaanganartumik imaluunniit paasinerlunneqarsinnaasumik peqqississutaasinnaaneraaassanngilaq,
- 11) nappaammik imaluunniit aqqunartiternermik pissuteqartumik imaluunniit nakorsaatip inuup timaanut imaluunniit timaata ilaanut sunniuteqartarnera pissutigalugu inuup timaata allanngorneranik takutitsisut assilisat, titartakkat il.il. ingasattajaartut, annilaarnartut imaluunniit paasinerlunneqarsinnaasut atorineqassanngillat,
- 12) nakorsaatip Kalaallit Nunaanni avataaniluunniit pisortat oqartussaasuinit akuerineqarsimaneranik ilisimatitsissummik imaqassanngilaq,
- 13) nappaatit ilungersunartut imaluunniit nappaatit ilungersunartut ilisarnaataat toqqaannartumik toqqaannanngikkaluamilluunniit oqaatigineqassanngillat, imaluunniit
- 14) misissuinerit, atuakkiat, atuagassiat il.il. innersuussutigineqassanngillat.

Imm. 2. Imm. 1-imi nr. 4-mi, 12-imi aamma 13-imi aalajangersakkat akiuussutissalersueqqusinernut assigisaannulluunniit Peqqissutsimut Naalakkersuisumit akuerineqarsimasunut atuutinngillat.

*Nakorsaatilerisunut il.il. pilerisaarineq*

**§ 5.** Nakorsaatilerisut pineqartut tassaapput nakorsat, ernisussiortuunerit, peqqissaasut, kigutit nakorsaat, uumasut nakorsaat, nakorsaasiortut aamma nakorsaatilerisut kiisalu suliat taakku iluanni ilinniagaqartut.

**§ 6.** Nakorsaat pillugu nakorsaatilerisunut pilerisaarinerit aamma paasissutissiinerit paasissutissanik

§ 2-mi imm. 2-mi nr. 1-6-imi taaneqartunik imaqassapput.

Imm. 2. Imm. 1-imi paasissutissat saniatigut atortussat taaneqartut aammattaq imarissavaat paasissutissat makku:

- 1) Nakorsaasiorfiup aqqa.
- 2) Nakorsaatip sumut iluaqutaasinnaassusia, nakorsaasiarineqarneranik eqikkaalluni allaaserisami allassimasutut.
- 3) Nakorsaatip sumut iluaqutaasinnaangissusia.
- 4) Nakorsaatit suussusii.

Imm. 3. Paasissutissiinermut atatillugu issuaanerit, takussutissiat aamma assiliartat nakorsaatit ilisimatusarfigineri pillugit atuagassianit, ilisimatusarnernit atuakkianit il.il. tigulaarinerit ilumoorluni issuaaffigineqarsimassapput najoqqutarineqarsimasullu eqqortumik ilisimatitsissutigineqassapput.

**§ 7.** Nakorsaatip pilerisaarutiginnissaa imaluunniit aamma tunisaanerata siuarsarnissaa siunertaralugu

- 1) nakorsaatilerisut aningaasatigut iluaqutissaannik, tassunga ilanngullugit akikilliliissutinik, pissarsiat tapiinik assigisaannillu imaluunniit ajunngitsorsiasanik aningaasaanngitsunik tunineqassanngillat, neqeroorfigineqassanngillat imaluunniit neriorsorneqassanngillat, imaluunniit
- 2) nakorsaatilerisut unammisinneqassanngillat akissarsiasaqartinneqassanatillu.

Imm. 2. Imm. 1-imi, nr. 1-imi inerteqqummi nakorsaatilerisup pineqartup inuussutissarsiutitut ingerlataanut attuumassuteqartut nioqqutissat naleqanngingajattut pineqartunut ilaanngillat.

Imm. 3. Imm. 1-imi inerteqqummi akikilliliinermik imaluunniit pissarsiat tapiinik aaqqissuussinerit nioqquteqartartup akissaajaatitigut sipaaruteqarneranik illuatungilerneqartut, akikilliliinerit akissaajaatinik pissuteqartut, pineqartunut ilaanngillat. Akikilliliissut imaluunniit pissarsiat tapiat akissaajaatitigut sipaarutininut naapertuutikannissaaq. Akikilliliissut imaluunniit pissarsiat tapiat tassaassaaq akinut ilanngaata, taamaallaallu nakorsaatinik pisisunut toqqaannartumik tutsinneqassalluni.

Imm. 4. Nakorsaatilerisut ajunngitsorsiasanik imm. 1-imik unioqqutitsisunik noqqaassuteqaqqusaanngillat tunineqassanatilluunniit.

**§ 8.** §§ 6 aamma 7-imi aalajangersakkat nioqqutissanik tuniniaaffinnik, nakorsaatinik pilerisaarinerimi pineqartunik piginnittunut sulisunullu taamatuttaaq atuupput.

### *Nakkutilliineq*

**§ 9.** Nalunaarut manna malillugu nakorsaatit pilerisaarutigineqartarnerat pillugu aalajangersakkat eqquutsinneqarnissaat Peqqinnissakkut Nakkutilliisoqarfiup nakkutigissavaa.

**§ 10.** Nalunaarut unioqqutillugu pilerisaarinerit unitsinneqarnissaat Peqqinnissakkut Nakkutilliisoqarfiup peqqussutigisinnaavaa.

Imm. 2. Inatsisunik unioqqutitsilluni pilerisaarinerimi akisussaasoq imm. 1-imi aalajangersagaq naapertorlugu aalajangiineq malillugu imaluunniit pilerisaarummik naqqiinerimik nammineq akilikaminik tamanut saqqummiusseqqullugu Peqqinnissakkut Nakkutilliisoqarfiup peqqusinnaavaa.

Imm. 3. Imm. 1 aamma 2 malillugit Peqqinnissakkut Nakkutilliisoqarfiup peqqusinera Peqqissutsimut Pisortaqaarfimmu suliassanngortinneqarsinnaavoq. Suliassanngortitsineq peqqusinerup atortilernissaanut kinguartitsissutaasinnaangilaq.

*Pineqaatissiissuteqartarneq*

§ 11. § 2, § 3, § 4, imm. 1, § 6 aamma § 7, imm. 1, unioqqutikkaanni akiliisitaasussanngortitaanermik pineqaatissiissutaasinnaapput.

Imm. 2. § 7, imm. 1, unioqqutillugu ajunngitsorsiassatut tunniunneqartut arsaarinnissutigineqarsinnaapput.

Atuutilerfia

§ 12. Nalunaarut atuutilerpoq ulloq 1. januar 2006.

Namminersornerullutik Oqartussat, ulloq 14. november 2005

Asii Chemnitz Narup

/

Søren Rendal